

2 Korin

¹ Ẹta, Kótóné ama kisipa mole ala sya furaalu, so whì tẹteróló kaae tare whì Yesu Kerisoné kutó dirópóló doteyale *aposel* whì Pol-né dapó.

I dere așeta ɗané no Timoti ɗamo wusuró bituraalu, ɗiɗa Akaia hae kwiamó Kótóné kae betero betere so whìró, ai hae kwiamó tene Korin bemó betere Kótóné fake so whitamopaae dapó.

² ɗané Aya Kótóro ɗa tẹteróló kaae tare Tale Yesu Kerisotamoné hamokoróló hale tao sere alaró, hosaa muni deyóló dua betere alatamo ɗiɗapaae erópóló yae.

Kótóta kọleturaalu tao sóró hɗi kisipa mulatere Talepó

³ ɗa tẹteróló kaae tare Tale Yesu Kerisoné Alima Kótóné doi hale sóró horópóló yae. Ti ɗa, kolené sukutere ala kaaratere Aya bitu, sekei ala wapakélé kisipa feléróló tao su betere Kótó betera.

⁴ ɗané sekei alarape feata, ama tao sóró ɗa kisipa felérótua dapó. Kótóné ɗapaae ai ala erótua dereteita, mepaae so whì kae kae seke tuamó betepa, Kótóné ɗapaae ai male kisipa feléraletere alané atimamo tao sópóló erapó.

⁵ Ti noatepae, Yesupaae erale doasi susupui ala feleyóló furaalu, ɗapaaekélé mo dekeró wou betera. Atétu, ɗané sekei alakélé Yesu Kerisoné tao sóró, ɗa kisipa felératere ala mo dekeró erateretei ɗaturaaalu, feleyóló mepaae so whipaaekélé fu betera.

⁶ Dá sekei ala su betereiteita hãle mei, diã feléyóló betóo, aluyaqsóro tao sóo, yópóló dapó. Atétu, Talené dã tao sóro kisipa felératepa, ti diãkélé feléyóló betaalopó. Dãtamo Kótóné kisipa felératere ala depa, ti aita, diã feléyóló beterópóló dapó. Dãpaae wou betere susupui ala kaae, diãpaaekélé wapa, ti ai eraterere feléi alané ai susupui ala hãle belée tanópóló, diã fotokọ bulat-
apó.

⁷ Diã take mo wisiyóló betaalopóló, dãné mo diriyóló kisiparapó. Ti noatepae, dãpaae wou betere susupui ala kaae, diãkélé ai su betere ape. Atétere kaaetóro, dãpaae erótu betere kisipa felératere ala diãkélé saalopó.

⁸ No nerape-ó, dã Esia hae kwiamó betepa, erale sekei alarape diaaọ kisipa yaasepóló dapó. Mo doasi sekei alané dã só deró betaleteiné, beleyaire mo sụnipó. Atéru dã mo sukutere dãmóo berterapóló kisipa mualepó.

⁹ Ita mo dapó. Dãné hosaa tuãmó mo turó muale kisipata, dã mo sukóló mole nisi yalepó. Téyaletei, dãpaae ai erale ala dãné sũmó belenére nisi yaqsóro, sukãle so whi kepaarótu betere Kótópaae kisipa tirópóló yalepó.

¹⁰ Dã felekemó mo ti dóló aluraletei, ama dã tao su yale kaae, nalopaaekélé atérótóro tao saalopó. Tétu diaaokélé dã tao sóro momarótu betepa, ti Talené dã aluyaqsóro tao sere ala hãle yó tareteiné dã hãtamo ãpaae kisipa tiró berterapó.

¹¹ So whi feané dã tao sóro momatu betere ala mo dokonóturaalu, Talené hamokoróló hãle tao sereteimó dã so whi feané ãpaae mo kée yaalopó.

Polo-né folosóró yaai kisipa muale ala fisikóló taarale fo

¹² Dá i haemó betó mole so whị kuamó kutukélé, diạ Keriso so whị kuamó kutukélé, Kótó tuamó wale mo kae ere alaró tó tikiné ini, kisipa mo turóné dere alatamo dạ tuamó mupa, so whị feané kelalepó. Atéro kutu yale ala dạné kisipa faróló taletepa hỏko ala ini, feané keletómó mo donoi ala yalepóló dạ hẩturaalu, bopé fake dapó. Atétu betaletei i haemó mole kisipa sya fóló ini, Kótóné hamokoróló hẩle tao sere ala sya furaalu yalepó.

¹³⁻¹⁴ Ti noatepae, dạné diạpae i asẹ dere fota, hapóluni, diaaọ dosayóló sụmó kisipanérápó. Dạné du betere ala mepae diaaọ kisiparetei, mepae diạ kisipanipó. Téretei, take nalopae ti diaaọ mo turó tuẹ yaalopóló kisipa mutapó. Take dạ tẹteróló kaae tare whị Yesu wale sukamó dạné diạ kilitu, hẩyóló bopé fake yaaire kaae, diaaọkélé dạ kilituraalu, hẩyóló bopé fake yaalopóló, kisipa mutu i dere ape.

¹⁵ Ai betené, ẹ mepae faai folosóró diạ betereró waairaaalu, ọla ọla taleyóló mulalepó. Até yaleteita, yạlo yó matere fo tuamó bole wisi ala diạ tamo félimó sỏpóló yalepó.

¹⁶ Ẹ Masedonia hae kwiapae furaalu, diạ keleté wóo ẹ momó fesaae woukélé diạ keleté wóo, yaai yalepó. Atéro ẹ aipae wapa, ti diaaọ ẹ tao sóró Judia hae kwiapae dotonaasepóló kisipa mualepó.

¹⁷ Yạlo ai muale kisipata, bete munipa hỏko yaleé? Ó i haemó mo whịné kisipa kaae mulu, ẹpó téyaalopó dutei, momómo meipó du dere kaae yaleé?

18 Tényi, Kótóné ama yaalopó dere ala motóró du dere kaae, dané diápaae yó mótu betere fota, épó, dutei meipó, fo kae dumipó.

19 Ti noatepae, diá kuamó ę Pol, Sailas, Timoti, da sore whirapené Kótó Naalema Yesu Keriso i kaae whipóló, diá tuamó yó móturaalu, ama épó dutei meipó, dere fokélé erapóló diápaae yaleé? Ai fo ini, Kótóné ama eraalopó deté wale fo fea Yesu tuamó dokonóturaalu, épó, téyaalopó fo betá deté konapó.

20 Ti noatepae, Kótóné ama mo eraalopó yóló muló betere forape fea, da teteróló kaae tare whi Keriso tuamó mo dokonóturaalu, épó, fotoró mulapó. Atéreteiné, Kótóné doi doasi mulóló, da Yesu tuamó bitu mo kée, téyópóló yae, fo dua dapó.

21-22 Dákelé, diákelé, da teteróló kaae tare whi Keriso tuamó diriyóló beteratere alata, Kótóné amatóró dua dapó. Da Kótóné ama so whipóló sóró beterótu, topomó *wel* wéi sùni yóo, da mo amapóló siriróo, take dápaae wisi ala eraalopó kisipa muópóló, ama Deí Kepe Wisi dané hosaa tuamó beteróo, erapó.

23 Kótóné keletómó yálo mo fo i dere ape. ę fe-saae wou ai Korin beró diá foné siré waai yaletéi, dei kisipa muaqsóró taaralepó.

24 Dáta, diaaę kisipa tiki tiratere ala teteróló kaae tare doasi aoyóló bitu dumipó. Tépatéi, diá háyóló beterópóló kisipa mutu, da diátamo kutó betámó ditu beterapó. Ti noatepae, diaaę kisipa tiki tiratere alané betá diá mo diriyóló beter-anérapó.

2

¹ Ẹ dià beterepaae waai kisipa mualeteti, take yało dià deteraayóló foné supa, diaaọ hosaa tuámó seke su yale kaae, momó yaọsóró taaralepó.

² Ti noatepae, yałotamo dià foné sóró só deróló sekei kisipa mulatepa, ti ẹ hẹkese yaaitere alamo, né eraaloé?

³ Yało diàpaae aseyale fota, ẹ dià beterepaae wale sukamó hẹkesei ala eraai yale so whinėtei, ẹpaae doasi sekei ala eraọsóró yalepó. Ẹ tuámó mole haị diaaọkélé saai kisipa mutu, yało dere fo mo wosóló sya fenérapóló kisipa tiralepó.

⁴ Ti noatepae, yało diàpaae așturaalu, hosaa tuámó doasi dekeýóló wole dua yalepó. Ita, dià dele sóró hosaa supu yópóló dumitei, yało diàpaae mo turó yaala sókó fole ala kisipa yópóló dapó.

Dowi ala yale whiné ama dowi ala kwia hąle kemerae yale fo

⁵ Whi me dené me whi hosaa tuámó sekei ala erélipa, ti ẹ maaté hosaamó sópóló ini, dià feapaaekélé eralepó. Aita dowi alatei, mo ti doróló aluraterere ala meipó.

⁶ So whi feané ai whi foné sóró haleraleteti supa, mió momó ini taalae.

⁷ Ai whi ą seke duraalu mo ti haepaae derepaọsóró ama yale dowi ala kwia tani, me ọla meipóló kisipa keteróló, ą tao sóró keteke bulóló fo wisitei yae.

⁸ Atéró diąné yaala sókó fole ala ama kisipa yópóló, ąpaae hąkeamó yae yóló diàpaae i dere ape.

⁹ Yálo diápaae yae yale fo fea diaaọ wisiyóló wosóló sya fuléro kǵae kelaai kisipa mutu aseýalepó.

¹⁰ Diǵanétamo me whǵiné dowi ala kwia tani kisipa keteratepa, ti yǵlokélé ai whǵiné yale dowi ala kwia tani, hǵle kemeratapó. Ai whǵiné me dowi alatamo itikimó, ti diǵ wisiyóló beterópóló tao saairaalu, yǵlokélé Kerisoné keletómó kemeralepó.

¹¹ I dere fota hǵle mei, Satan-né dilikóló dǵané dere ala doraqsóro dapó. Ti dǵta, hǵle mokǵleyaayóló bitini, Satan-né so whǵi doraai dilikitu betere ala dǵané mo kisiparapó.

Talené ama yóló muló betere fo wisi tuǵmó ama kae ere dǵfanapó

¹² E Troas bemó betere so whǵipaae dǵ tǵteróló kaae tare whǵi Kerisoné fo wisi yó melaai felemó, ai fo yó melópóló Talené tǵ doasi muló betepa kelalepó.

¹³ Aimó kutó diyaai yaleteti, yǵlo no Taitus bitinire betené yǵlo hosaa muni derepéni kisipa sekǵtepa, ai so whǵipaae kǵleó fomaaté yóló ǵ Masedonia hae kwiapaae felepó.

¹⁴ Tépaatei dǵ Keriso tuǵmó betepa, Kótóné ama bóe whǵi dóló tǵteróló sale ǵlapóló betere dokǵ hǵkeamó hǵkesetamo dapesó fu beterapó. Atétere alané me ǵla felé kǵlaa wisi woutere kaae, Kótó ǵ etei kaae Tale beterapóló so whǵi feapaae yó mótu beterapó. Atéreteimó, Kótópaae mo kée du betenérápó.

¹⁵ Kerisoné Kótópaae hǵle matere ǵla tuǵmó sókó wale kǵlaata ti dapó. Ti ai kǵlaata, aluyaqsóro

tao sere so wh̄ipaaekélé, sukóló mo ti aluyaaire so wh̄ipaaekélé wou beteraṗó.

¹⁶ D̄a i fo yó matere wh̄irapeta, mo ti alu du betere so wh̄iné kulumumó ti sini ọ́la kẹ́laa kaae wóo, aluyaṗsóró Kótóné tao su betere so wh̄iné kulumumó, ti mo betere felé kẹ́laa wóo, du beteraṗó. Atei kaae hapólui ala mé wh̄iné s̄umó enére?

¹⁷ So wh̄i feané *moni* saai kisipa mutu, Kótóné fo yó mótu dere kaae, d̄ané dumipó. Ai ala ini, Kótóné keletómó ama dotẹ́yale wh̄i aṗyóló Keriso tuamó bitu, mo wisi kisipatamo mo fotóró yó mótu beteraṗó.

3

¹ D̄anétei d̄a yó matere wh̄ipóló dukiraterere fo momó yaai dapóló de? Ó d̄ata etei kaae so wh̄ipó kisipa yóṗóló aṣeyóló matepa só fole wh̄irapené dere kaae d̄ané de? Mepaae wh̄irapené dere kaae, d̄a etei kaae wh̄ipó yóṗóló, aṣékó eróló diṗaae yó melaai, ó diaaṗ d̄a melóṗóló wosetere nisi de?

² Aita ti diṗátóró iru, d̄ané hosaa tuamó aṣereiteiné so wh̄i feané kolóló dos̄anéraṗó.

³ Diṗata, d̄a t̄eteróló kaae tare wh̄i Kerisoné aṣereiteiné diaaṗ du betere ala so wh̄iné kilituraalu, ita Pol-sépiné diale kutómó oleyale dupóló haṗkearatapó. Aita mo aṣetere w̄éiné ini, mo ti betó tare Kótóné Kepe Wisiné eró beteraṗó. Ai aṣeta, mo kane fake tómó ini, so wh̄iné hosaa tuamótóró eraṗó.

⁴ Ai ala erémólóṗóló tuẹ́ tamo muluraalu dumi, Kótóné keletómó d̄a t̄eteróló kaae tare wh̄i Kerisoné d̄a fotok̄ratepa, mo ere alatóró halaaíné dapó.

⁵ Ai alata, ðanétei kaayóló ipakó, ðané yalepó fo enénipó. Aita, Kótó ą tuąmó ere alané ða sұratepa du beteraþó.

⁶ Ti Kótóné ama kutó diratere whı bitu, ama so whı tao saalopóló mulale dirii kisi fo erópóló, ama fotokọ ðapaae mo sұralepó. Ai fota, asené ini, Ðei Kepe Wisiné eró beteraþó. Ti noatepae, asere foné ða dóló sukunateretei, Ðei Kepenéta, ðamó mo ti betere bete mótu beteraþó.

Kale kisi fo tuąmó ama mo kae ere ðe wisinaale fąanapóló ere fo

⁷ Take Moses-né Kótóné ala eróturaalu, kane fake tómó aseýale fo yó malepó. Ai foné so whıpaae sukutere alatei eralepó. Ai alata, ðe wisinaaletamo weipakalepó. Ai ðeta, alu deté faaipatei Moses-né kelepa a ðeyó faleteiné, kele deteliru Israel fake so whıné ama kelepa a diriyóló kilini ipakalepó.

⁸ Mió Ðei Kepe Wisiné erótu betere alatamo wale ðené take ai alatamo wale ðe mo ti bosenó bitinipóló de?

⁹ Kale tukóló muló betere fo sya furaalu du betale alané, so whı fea taleyóló só deró betereþó. Ti ai alata, Talené ðe wisinaaletamo weipakalepó. Téyaletai, mo donoi so whıpó dere ala tuąmó wale ðené kale folosóró wale ðe mo ti bosenó beteraþó.

¹⁰ Ti take alatamo wale ðe kolósu, mió ere alatamo wale ðe kolósu depa, mió ere alané ðe mo doasi ereteiné take wale ðe hąle ọla kaae aoró beteraþó.

11 Take mo hãleke sukamó maaté yóló alu deté fele alata, dẽtamo walepó. Téyaleteti, mo ti deté fu betaaire alatamo wale dẽta, mo doasipó.

12 Take nalopaae dã atei wisi ala tuãmó be-taalopóló kisipa mutu dã wini, halaainé Talené ala i erótu betere ape.

13 Moses-né kelepaamó ere dẽ alu deté fo-letei, Israel so whĩné kelaqsóró, kutiné husurótua ipakalepó. Mió dãné ai yale kaae enénipó.

14 Tépateti, take atimané kutiri hapólu ipakalepó. Atére kaae, take atimané kutiri husirale kuti miókélé hãle iru, take tukóló mulale fo dosãatepakélé, atima tuẽ hapólutóró yó tarapó. Ai husiró betere kutita, mené dãae faranénitei, Keriso tuãmó betere alané betã dãae faranérápó.

15 Mió i alimókélé, Moses-né asẽre fo dosãatu betepatei, atima kisipa tiki hapóluru, hosaakélé hãle tare alata, kutiné kelepaa husuró betere kaae erapó.

16 Tépateti, mepaae so whĩ de Talepaae kisipa feteyóló wapa, ti ai husiró betere ala kuti kaae dãae fótú beterapó.

17 Tale ąta, mo Kepetóró beterapó. Talené ama Kepe betere tikimó me alané dokoni, teraae fóló hãle beterapó.

18 Mió kutiné kelepaa husirénire so whĩ dãpaae Talené ama ere dẽ wisinaale erótu beterapó. Ai dẽ dãné kaae tapa, ti mepaae so whĩné dã tuãmó ai ere ala kelenérápó. Tẽtu, dãkélé Talené ama aso kaae beterópóló, ama wisiraté fu beterapó. Ti ai dẽ wisi erótu betere Kepeta, Tale ątórótípó.

4

Mo haené aleale wutimó doasi ke bole ɔlarape derapóló ere fo

¹ Atérené, Kótóné ama ɗa ɔleturaalu, tao sóró melale kutó hýyóló taaréni, hałe dirótu beterapó.

² Atéturaalu, kikiti kinóló dere alakélé, enénire halei alakélé, kapala dilikitere alakélé, Kótóné fo doróló wɛratere alakélé, ɗané mo dumipó. Ai ala ini, Talené ama mo fo yó mótu beterapóló, so whiné hosaamó sɔpóló, Kótóné keletómó mo haɓkeamó erótu beterapó.

³ ɗané i yó mótu betere fo wisitamo mepaae so whiné wosaairetei hapóluyóló husuró betepa, ti aita mo ti aluyaaire so whi ai ape.

⁴ Ti mió i alimó tɛteróló kaae tare kapala kótóné Talepaae kisipa tiki tirénire so whiné ai fo wisi tuamó ere ɗe wisinaale kelaɔsóró, atimané kisipa hapóluróló husiralepó. Ti aita hałe mei, kale fo tuamó Kótóné aso kaae betere whi Kerisoné ere ɗe wisinaale kelaɔsóró erapó.

⁵ Ti noatepae, ɗané i yó mótu betere fota, ɗatei doi sóró horótu dumi, Yesu Keriso a Talepóló ama doi sóró horótu beterapó. Atérené ɗa Yesuné ala eróturaalu, ɗiɗa tao sóró diaaɔ kutó diratere whirape i betere ape.

⁶ Ti noatepae, “Diliki tuamó ɗeyó fae,” yale Kótónétóró ɗané hosaa tuapaae ɗeralepó. Ai ɗeta, ɗa tɛteróló kaae tare whi Keriso aторó ereteiné ɗané a kaae tapa, ti Kótóné ama ere ɗe wisinaale kisipa enérapó.

⁷ Tépatei, ai bope deté wale ke bole ɔlarapeta, mo haené aleyale wutirapemó deró beterapó. Ti fea

ala ɗa tuamó kaayóló dumi, Kótóné ama fotokó ɗa tuapaae sɗatepa dapóló, so whiné kisipa yópóló erapó.

⁸ Kotere tiki dokó sekei ala ɗapaae erótu betepatei, ai alarapené ɗa haepaae deróló, mo ti só derótimpó. ɗa noa ala yaalorópóló kóló kóló epatei, ɗané kisipa mo ti fomaake inipó.

⁹ Talené ala erateremó, ɗapaae susupui ala erótu betepatei, Talené ɗa taaló bitini, tao su beterapó. Mepaae so whiné ɗa só deróló dorótu betepatei, mo ti dorótimpó.

¹⁰ Yesu ɗa kepaaróló betemale fotokó ɗa tuamó mupa so whi feané hakeamó kolópoló, ɗa sukale ala ɗané tikimó mupa kutu beterapó.

¹¹ Ti noatepae, sukuni ɗa betere whirape Yesuné ala erateremó ɗa dóló aluranépatei, ama betere bete ɗané mo tó tikimó mupa so whiné hakeamó kolópoló, yó maté kutu beterapó.

¹² Ti Talené ala erótu betereteiné sukutere ala ɗa tuamó mupatei, ɗiɗa tuamóta, mo ti betere bete moleteiné ɗiɗa mo beterapó.

¹³ Ašemó i fo erapó.

“Talepaae kisipa tirale betené yało ai fo yalepó.”
Ai fo yale whi ɗa kisipa tiki tirótu yale kaae, ɗakélé atéru, ɗiɗapaae i yó mótu betere ape.

¹⁴ Tale Yesu kepaarale sekéné ɗa kepaarótu yale kaae, ɗakélé kepaaróló ɗa betere tikimó ɗatamo touróló betamó beteraalopóló kisipa mutapó.

¹⁵ ɗané ɗiɗa tao su betere alata, ɗiɗa mo wisiyóló beterópóló kisipa mutu du beterapó. Até dereteiné, Talené so whi hamokoróló hale tao siré fóló, mo ti fakeraalopó. Atéturaalu, ai so whi

atimanémo, Kótópaae mo kée dere fo dekéro yó tapa, ti mo kae de fãane Kótóné doi doasi saalopó.

¹⁶ Atéyaalopóló kisipa mutu, ðané ditere kutó fomo duraalu taaraalomeipó. Ðané mo tó tikita, do deté fu beteretei, ðané kepe tuãpaae ti betere dokó kisi whi aleraté fu beterapó.

¹⁷ Ti noatepae, ðapaae erótu betere sekei alarapeta, hãleke sukamó maaté muaaireteiné ðané sumó belenérápó. Ai sekei alarapenétei, take nalo mo ti muó tawaaire de wisinaale ðapaae eraalopó. Ai eraaire ala wisi kolósu, mió su betere seke kolósu depa, mo hãle ọla aorapó.

¹⁸ Atéreteiné ðata, ðané kelené kelere ọla kaae tani, kelenire ọla kaae tarapó. Ti noatepae, kelené keletere ọlata, mo hãleke sukamó maaté muaalotei, kilinitere ọlata, ti mo hãle muótóro tawaalopó.

5

Dã mo ti betaaire be hepen-mó erapóló ere fo

¹ I haemó ðã betere kapala furu be fisikó fupa, ti me ọla meipó. Ti noatepae, mo ti be Kótóné ðamó hepen-mó tenó beterapó. Ti ai beta, mo whiné naasené tenipó.

² Ai bepaae faai ðã i haemó hãle bitu, mo kuti derótu dere kaae, hepen bemó tene be atéro deranée yóló doasi kisipa mutu beterapó.

³ Ti atei kuti deratere be ðemó, mepaae whiné ðã tiki daapi hãlepa kelaalomeipó.

⁴ Dã i haemó kapala furu bemó bitu, sekei ala beleté furaalu, i be taaróló fenée yóló doasi kisipa mutu beterapó. Ti ðã daapi hãle betaai kisipa

muni, ɖa betaaire hepen beta, kuti derótu dere kaae derané du betera. Téturaalu, mo ti betere alané sukutere ala ɔla kaae nó deróló, ama tikitóro alée faalopó.

⁵ Kótóné ɖa atéro aleyóló betero betereitea, ti i bope yale mo ti betaaire tiki wisi saalopóló kisipa mutu erapó. Ti aita, nalopaae eraaire ala mo turó saalopóló kisipa muópóló, Kótóné ɖapaae Deji Kepe Wisi melalepó.

⁶ Térené, ɖa i haemó mo tó tikitamo haɓe bitu, Taletamo betamó bitinipó. Atépatéi, take nalo Taletamo betamó betaaire ala ɖané diriyóló kisiparu whaaliani, betere dokɔ ɖané kisipa tiró betera.

⁷ ɖa mió i betereitea, kelené keletere ala sya furaalu ini, tué tiki tiratere ala sya foletéiné betera.

⁸ ɖa i daale tiki taaróló, Taletamo betamó betaaire kisipa mupatei, ai ali sókó waaɓi teópa, ɖa wisi kisipatamo kaae taté fu betera. Ti nalopaae ai ala mo eraalopóló kisipa mutu, ɖa halaainé betera i dere ape.

⁹ Térapa, ɖa i betere tikimó ó kae tikimó betepakélé, me ɔla meipó. Ti Tale a kisipa felé yaaire ala betá ɖané doasi keteké buóló du betenérápó.

¹⁰ Ti noatepae, ɖa teteróló kaae tare whi Keriso so whi taleyaai betere tikimó betepa, ɖa so whi fea taleyópóló, betá betá yóló daaneta yaalopó. Atépa, ɖané yale ala fea haɓeamó taleyaalopó. Atéturaalu, ɖa mo i tiki daayóló bitu yale wisi alamó, ti wisi dupu melóo, hoko yale alamó ti dowi dupu melóo,

yaalopó.

So whiró Kótótamo bóe fióló betamó beteratere ala

¹¹ Térapa, so whi feané du betere alamó Talené kwia melaairetei hásókó feni, mo yaalopóló dā wituraalu, so whipaae dowi ala taaróló, tué tiki feteyae yóló, dotopo du beterapó. Ti dā betere alata, Kótóné mo hakeamó kelerapó. Atére kaae, diaaokélé dā etei kaae whi beterapóló diriyóló kisipa eranée du beterapó.

¹² Dāné diāpaae i dere fota, diaaō dā dukirópóló dumitei, dāné du betere ala kilitu, diā hai yópóló dapó. Tétu, hosaa tuamó ere ala kilini, tó tikimó ere ala kilitu betere whirapené dā erateremó, atimapaee tokó melaaire fo i dere ape.

¹³ Dātamo topo doyóló keyaa fole whirape aōpa, ti Kótóné ala eróturaalu dapó. Motamo wisi kisipa mole whirape aōpa, ti diā tao saairaalu dapó.

¹⁴ Dāné i du betere ala feata, Kerisoné ama yaala sókó fole ala wisiné dā keteke bulatepa dapó. Ti noatepae, so whi mo fea tao saai betā whitóró sukālepó. Téturaalu, ama so whikélé fea ātamo betamó sukālepó.

¹⁵ Ti so whi fea tao saai ā sukāle alata, betere so whi maaté wisiyóló betaaire ala ini, atima tao saai sukóló kepaayale sekéné ama kisipa mole ala betā erópóló yalepó.

¹⁶ Atérené dā mió i alimó kaae sóró bitiré furaalu, mepaae so ó whi i haemó mole kisipa sya fóló, etei kaae so whi beterapóló dāné tale dumipó. Ti taketa, dāné i haemó mole kisipa sya fóló, dā

tęteróló kaae tare whị Keriso atéró tale yaleteti, mió dạné momó kae dumipó.

¹⁷ Tęrapa, mepaae so whị Keriso tuamó betepa, ti ai so whị Kótóné kisi kaaróló beteró beterapó. Atétere alata, take betale ala mo ti kemeróló, mió kisi ala tuamó ai betere ape.

¹⁸ Atéró beteratere ala feata, ti Kótó beteremó kaayóló walepó. Dạró Kótótamo bóe du betaleteti, Kótóné Keriso sukópóló maletiné bóe firóló touralepó. Atére kaae, mepaae so whịkélé Kótótamo bóe fiyóló dua betere ala dapaae malepó.

¹⁹ Aita hẹle mei, i haemó betó mole so whịné Kótótamo bóe du betepa, Kerisopaae erale alané atima yale dowi alamó Kótóné kwia melaai yaleteti taaróló, bóe firalepó. Tétu, Kótóné so whịtamo bóe fiyóló betamó beteratere fo yó maté kwęyópóló, dạ sóró beteralepó.

²⁰ Atérené, mió dạ Kerisoné ama fo eratere whịrape i betere ape. Diạ so whị Kótónétamo bóe fiyóló touyóló betaaire fo ama diapaae yaalopó yale kaae, “Kótótamo bóe fiyóló betae,” yóló Kerisoné doimó dạné diapaae dirii ma fo i dere ape.

²¹ Yesu dowi ala inire whịtei, Kótóné ạ dowi ala dere whị aọralepó. Ti aita hẹle ini, dạ Yesu Keriso tuamó betepa, Kótóné ama so whị donoraaire ala dokonótu, dạ mo donoi so whị aleróló beteralepó.

6

¹ Dạ Kótótamo betamó ama kutó diratere whị bitu, diapaae Kótóné hamokoróló hẹle tao sere ala eratepa, ai ala hẹle ọla kaae depaae mulaqsóró, diapaae ma fo i dere ape.

² Ti noatepae, ama i fo dapó.

“So whi yało hãle hamokoróló tao sere alimó diaaḡ epaae tao sae dere fo yało mo wosóo, diã aluyaḡsóró tao saai tukóló mulale be demótóró yało diã tao sóo yalepó,” erapó.

Yało diãpaae mo i dere ape. Mió i sukamóta, so whi aluyaḡsóró Kótóné hamokoróló hãle tao su beterapó. Ai ala yaaire be de me kae mei, mo miótóró i ape.

Pol doasi seḡ sale fo

³ Dãné so whi tao saai erótu betere ala mepaae whiḡapené bete muni, hõko ala nisiyóló faletu só deraḡsóró, mepaae so whi Kótópaae waaire tu sesé yóló dee nalatere ala dãné mo dumipó.

⁴ Aténi, dã Kótóné kutó diratere whi bituraalu ditu betere kutó diaaḡ kolóló, i whiḡapené mo donoi ala dapóló kisipa yaasepóló i dapa wosae. Ita doasi depe tukó wei kutópatei hãle diyó taruraalu, seḡi alakélé, ɔla ɔla yaḡḡtere alakélé, whaalia dere alakélé, wou betepatei dãné hãle belée tarapó.

⁵ Dã kotere tiki dokḡ fea doasi foya dere alakélé, dóló susupuratere alakélé, *dipula* beteraterere alakélé, erótua dapó. Dã nokekélé wisiyóló fini, wotetamotei doasi depe tukó wei kutó hãle ditu beterapó.

⁶ Atétu, dã me dere dowi alatamo hoseké ini, mo donoi kisipatóró muóo, bete mole ala mo wisiyóló kisipa yóo, me whiḡpaae seḡtere ala ini, wisi kisipatamo naameiné mo dua kaae taté fóo, du beterapó. Tétu, hosaa turóné yaala sókó fole ala yópóló,

Dẹi Kepe Wisiné dą fotokọ eratepa, ai ala dią so whị feapaae erótua dapó.

⁷ Kótóné fotokọtamo mo fotóró duraalu, fo wisi yó mótua dapó. Tétu, Kótóné so whị donoratere alata, bóe dele whịné turu naasené tọ tawóo, fẹ naasené wuti tawóo dere kaae iruraalu, ai donoi ala dạné tarapó.

⁸ Mepaae whịné dạné ditere kutó kilitu dą dukiróo, mepaae whịné ti eratere fo yóo, dua dapó. Mepaae whịné dạné ditere kutó dorapóló mepaae so whịpaae yóo, mepaae whịné ti mo wisi kutó ditu beterapó yóo, dua dapó. Dą mo ala dere whị betepatei, mepaae whịné ti dą kapala atima dilikitere whịrape aqrótu beterapó.

⁹ So whị feané dą kisi eatei, dą teó kisi wale whịrapepaae eratere ala kaae dua dapó. Dą mo felekemó sukunéatei, hąle bitiré fu beterapó. Dą fokosói ala yóló susupu eraletei, mo ti dóló sukunénipó.

¹⁰ Dą dekené sukutu betepatei, betere dokọ hẹkese yó tarapó. Dą fea ọla ọla munire whịrape betepatei, dạné du betere alané so whị fea néli whị beterótu beterapó. Dą ọla ọla munipatei, fea ọla mole whịrape beterapó.

¹¹ Korin bemó betó mole no nerape-ó, diątamo dạné hosaa mo turó muluraalu, dạné mole kisiapa mo fea diąpaae hẹkeamó ai yale ape.

¹² Dạné diąpaae yaala sókó fole ala dạné tao tani, mo turó erótu betepatei, diaaọ dąpaae yaala sókó fole ala ti kinóló tao tarapó.

¹³ Dią yało naale senaale kaae betereteiné, diaaọkéle dąpaae hosaa mo turó muóló, yaala sókó

fole ala u mótu i mótu yaasepóló, yało diąpaae i dere ape.

Kisipa tiró betere so whı́ tirénire whıtamo touyaqse ere fo

¹⁴ Dią Talepaae kisipa tiró betere so whı́rape kisipa tirénire so whıtamo touyóló, dere ala fea betámó yaqse. Ti noatepae, donoi ala koló^{su}, dowi ala koló^{su} depa, betą ala ere? Ti demó kotere so whı́ró dilikitamo kotere so whıtamo netéró fulumu enére?

¹⁵ Dą teteróló kaae tare whı́ Kerisoró dowi keperape teteróló kaae tare kepe Belial-tamo touyóló betą kisipa muaaloé? Tuę tiki tiró betere so whı́ró, tuę tiki tirénire so whıtamo betą ala ere?

¹⁶ Kótóné doi hale horóló moma dere beró kapala kótó sųróló aleale ąlarapetamo mo betą ala erapóló kisipa mute? Ti noatepae, dą Keriso so whı́ta, mo ti betere Kótóné momatere be tenapó. Ai yale fo kaae ašemó Kótóné i fo erapó.

“Ę atimatamo betámó bitu, atima fole tikipaae ękélé faalopó. Tétu, ę atima teteróló kaae tare Kótó betóo, atima ti yało so whı́ betóo, yaalopó.”

¹⁷⁻¹⁸ Mo doasi fotokọ bole Talené i fo dapó.

“Ai so whıtamo hosekéró beteretei taaróló dią kaae betae. Atéru, mepaae naqse yóló fo mulale ąla mo olaayaqse. I dere fotamo diaaq sya fupa, ti yało dią dape saalopó.”

Mo doasi fotokọ bole Talené i fo dapó.

“Ę ti diaaq Aya betóo, dią yało naale senaale betóo yaalopó,” erapó.

7

¹ Hosaa mole no nerape-ó, Talené d̄apaae ai wisi alarape eraalopóló muló betere fo h̄ale mulapa, kae kae dowi alané diaaḡ tiki ó kepe doraḡsóró, ai kaae dowi ala tuamó hosekéró bitini, tika kae betaalopa sae. Atéró Kótó kolóló wituraalu, ḡ aḡmó sukóló bitiré fóló, Talené ama mo kae ere wisi ala maaté eróló, mo ti fakeraté fu betae.

Pol h̄ajiné suk̄ale fo

² No nerape-ó, d̄apaae diaaḡ hosaa munire aḡrapa, mióta dīané d̄apaae hosaa mutere ala yaasepóló i dere ape. Ti noatepae, d̄ané mepaae so ó wh̄ipaae me dowi ala eréni yóo, d̄ané du betere alané atima mepaae so wh̄i dée naaire tu munéni yóo, d̄ané dere ala diaaḡ tokóló yḡpóló, ó dīané mepaae wisi wisi ḡla saai dīa dilikini yóo, yalepó.

³ Ȳalo i dere fo dīa só deraai kisipa mutu dumipó. Ȳalo take yale fo kaae dīapaae d̄ané hosaa mo turó moleteiné d̄a tekeni dīa sukutepa ó betepa, ti d̄a fea bet̄a alatóro du betenérápó.

⁴ Diaaḡ ȳalo i dere fo wosóló, mo sya faalopóló kisipa mutu ę whaalia ini, bopé fake yóló h̄ajitu betepapó. Kae kae sek̄e d̄apaae wou betepatei, dīa Talepaae tué tiróló wisi ala h̄ale yó tareteimó, ę h̄aj yóló wisi kisipatamo Talepaae ȳalo mo kée du betepapó.

⁵ D̄a Masedonia hae kwiapaae wóló bitu, Talené ala eratepa mepaae wh̄iné d̄ané dere ala yaḡsóró tu fea mo seséyalepó. Atétu, mepaae wh̄irapené d̄atamo bóe dóló h̄ole sóo, d̄ané kepe tuḡpaaekélé, wituraalu whaalia yóo, yaleteiné d̄ané tiki s̄a nalóló bitinipó.

⁶ Téyaletei, Taitus dā beterepaae wale alané, fo-moyóló haepaae doropole so whi tao sóró keteke bulótu betere Kótónétei dā tao sóró haj dere ala eralepó.

⁷ Ai alané maaté mei, diaaḡ ḡ tao sóró haj dere ala eratepa, amamo dāpaae ene waleteiné dā tao sóró haj eralepó. Diaaḡ ḡ kelenée du betereiteikélé, diaaḡ ḡ ḡsókó fóló yale alamó diḡné hosaamó su dekené sukutu betereiteikélé, ḡpaae erótu betere alamó diaaḡ whaalia du betereiteikélé, fea dāpaae ene walepó. Ai fo wosetu, ḡ tuámó haj dere ala mo turó fāayalepó.

⁸ Yālo diḡpaae anale ašemó ere fonétamo diḡ dekei kisipa moipa, yālo atei kaae fo noatepa yaleé? yóló kisipa mutumipó. Taketa atei kisipa mo mualetei, mió ḡ haj kisipa mutapó.

⁹ Ti ai hajta diḡ deketere alamó ini, ai fo dosḡaturaalu diḡ sawa sukamó maaté hosaamó sóró dekeyaletéine yalepó. Atéteremó diḡ donoi tuḡpaae fole kilitu, ḡ haj du beteraḡpó. Ti noatepae, diḡné deke yale alata, dāné yale foné diḡ mo ti doréni, Kótóné ama kisipa mole ala eraleteiné tu wisipaae feletei kisipa mue.

¹⁰ Kótó tuámó kaaróló wale deke dere alané dowi ala taaróló, Talepaae kisipa fetetere ala eratapó. Atéturaalu, kisipa fetetere alané, ti aluyaḡsóró tao sere ala kaaratapó. Take dekei kisipa mualetei, yālo mió kisipa fatepa, mo donoi ala ereteiné Talepaae mo kée du beteraḡpó. Tépatéi, i haemó kaarale dekei alané ti sukutere ala kaaratapó.

¹¹ Kótó tuámó wale dekei alané diḡ tuḡpaae erale alarape i ape. Kótóné ala eraai butere

ketekəkélé, me dowi ala inipatei, haḷe só deratere kapala fo so whiné mo nisi yaqsóró, ketekə buóló haḷearótu betere alakélé, dowi alatamo fopaae butereteikélé, mené diḷ doraqsóró wisiyóló kele muló betere alakélé, diḷ ḷatamo betené du betale alakélé, so whi wisiyóló beterópóló ketekə bulótu betere alakélé, mené dowi ala deretei haḷeamó kemerópóló, donoraai bole ketekəkélé, kale deḷ dere alané eralepó. Yḷo ašemó yale forape diaaḷ dosaayóló ai fo mo wosóló sya feleteiné mió diḷ tuámó yḷo foné saai dere ala muniretei haḷearalepó.

¹² Take yḷo diḷpaae ašemó yale fota, dowi ala dere whimó kisipa mutu, ó ai dowi ala eratere whimó kisipa mutu inipó. Téní, Kótóné keletómó ḷané dere fo mopóló wosóló eraaire ketekə diaaḷteí kisipa yópóló yalepó.

¹³ Ai alarapené ḷa mo tao sóró ketekə bulalepó.

Ai ketekə tómó diḷ feané Taitus-né ama kepe tuḷpaae felératere ala eraleteiné ḷ mo haḷtamo fesaae wale ala kilitu, ḷakélé mo doa haḷyalepó.

¹⁴ Yḷo diḷ dukirótu ḷpaae yale fo motóró dokonótu, ḷ wisiyóló dape saleteiné ḷ hale ini, feléi kisipa mutapó. ḷané diḷpaae yó matere fo fea motóró du dere kaae, ḷané diḷ dukirótu Taitus-paae yale fo ama mo irapóló kisipa yalepó.

¹⁵ Taitus aipaae wapa diḷ winé sukutu diri furu furu yóló, naameiné diaaḷ ḷ mo wisiyóló dape salepó. Take ama atéro ene wale fo diaaḷ mopóló kisipa mutu wosóló, sya fele ala mió ama kisipa duraalu, diḷpaae yaala sókó fole ala mo ti fḷatapó.

¹⁶ Yḷo i dere fo fea diaaḷ wosóló mo eraalopóló,

yalo kisipa tiróturaalu, ę mo doa hajné sukutapó.

8

Hajtamo hęle matere ala yópóló ketekę bulatere fo

¹ Ne norape-ó, Masedonia hae kwiamó tę mole be huluamó betó mole Keriso fakerape Kótóné hamokoróló hęle tao sóró male ala diaaę kisipa yaasepóló i dere ape.

² Ti ai so whı atima kęae kelaai mepaae seķę wou betaletei, hękesetere ala mo turó fęayóo, mepaae ęla ęla ó *moni* meiyóló yoleale betóo epatei, atimamo hamokoyóló *moni* mo dekéró deralepó.

³⁻⁴ Atéró mo dekéró deręleta yaleteiné sókó faai yale dęle mo ti bosene felepó. Aita, atima kęleaanétei Judia hae kwiamó Kótóné kae beteró betere so whı tao saai kisipa mutu, mepaae so whıné hamokoróló hęle derale *monitamo* touróló, atima mole ęlakélé hajtamo deraai kisipa mutu, melaaire tę mulae yóló dępaae dotopoi fo yalepó. Ti aita, so whı hamokoyóló hęle tao suraalu yale alapóló, yalo diępaae i dere ape.

⁵ Dęné kisané atima sumó enérápóló kisipa muale ala mo ti bosenóló, atimané yaai dere alakélé, ęla ęlakélé, betere betekélé, fea Talené naase tuamó mulalepó. Atéró nalo ti atimakélé dętamo touyóló Kótóné kisipa mole ala eraai yalepó.

⁶ Atérené, Korin bemó betó mole so whı dięné ai ala yópóló, Taitus ę dię beterepaae fae yóló seęyalepó. Ti aita, Taitus-né ama taketi kaae sóró

diale kutó ereteiné, mió ą dią beterepaae wapa, Talené hamokoróló tao sere ala diaaę eróló mo ti kemerópóló yalepó.

⁷ Térapa, diaaę tuę tiki tiratere alakélé, fo wisi yó matere alakélé, mo bete mole ala kisipa dereteikélé, mepaae ala eróturaalu, doasi ketekę bole alakélé, dąpaae yaala sókó fu betere ala alakélé mo wisirapó. Atétere kaaetóro hamokoróló tao suraalu, atéro hąle matere alakélé mo wisiyóló yae.

⁸ Yało i dere fota, diąpaae i ala yae yóló dumi, Masedonia whırapené mepaae whı tao saai butere ketekę koló_{su}, diaaę butere ketekę koló_{su} yóló, dią tuamó mo yaala sókó fole ala muluraalu, déro kąae kelaai dapó.

⁹ Ti noatepae, dą teteróló kaae tare whı Yesu Kerisoné hamokoróló tao sere ala diaaę ai kisi-pare ape. Ti ą doasi néli whı betereitei, dią tao saai kisipa mutu, yoleale whı alée feleteiné dią néli whı beteralepó.

¹⁰ Diąné yaaitere alamó kisipa mutu, diąpaae yało kisipa matere fo i dere ape. U kemeyale ba fomó mepaae kae kae be hulua Keriso fake so whıné *moni* deraaipa, diaaępi folosóro deróo yalepó.

¹¹ Diaaę atéro diale kutó ketekętamo kaae su yale kaae, miókélé ai alatóro deté fóló kemerae. Atéro melaai kisipa mutepa, ti diaaę mole sųtóro melae.

¹² Diaaę mole sųtóro wisi kisipatamo matepa, ti Tale ą hękese duraalu, ama kisipa feléyaalopó. Mepaae whıné melaaitere ęla munipa, ti Talené me ęlakó menipóló dei kisipa muaalo meipó.

13 Dáné kisipané mepaae wh̄irape atima ọ́la ọ́la mo dekéro muluraalu, dīa sawa téti moleteiné seke tuámó beteraai dumi, fea bet̄a alatóro yóló betaai i dere ape.

14 Mió dīa ọ́la ọ́la mo dekéro moleteiné, atima yāyātere ọ́la dīané melóo, nalo dīamo yāyātepa atimané dekéro moletei dīa melóo yópóló dapó. Atéro u tao su, i tao su depa, ti mo fea bet̄a ala yólótóro betaalopó.

15 Atétere alata, ašémó i ere fo kaaepó.

“Mepaae mo dekéro sale wh̄iné ọ́la buki muni feni, mo s̄umótóro nóo, mepaae mo tórōti sale wh̄i wote ini, mo s̄umó nóo, yalepó,” erapó.

Taitus Korin bepaee doteyale fo

16 Yālo dīa tao sópóló, ẹ ketekẹ bulale Kótóné Taitus-paaekélé ai kaae ala eró betepa, Kótópaae yālo mo kée du beteraapó.

17 Atéreteiné, ẹ d̄ané fae depa waalo meitei, mo taketi dīa beterepaae waai du betaleteiné waalopó.

18 D̄ané no wh̄i bet̄a Taitus-tamo wópóló doto-natapó. Ai wh̄ita, mió wosetere fo wisi erateremó, Kótóné kae beterō betere so wh̄iné dukirótu beteraapó.

19 Ai ala maaté mei, kale hāle melale *moni* sóro, d̄atamo Judia hae kwiamó betó mole so wh̄imó male fópóló, Kótóné kae beterō betere Keriso so wh̄iné ẹ sóro beteralepó. Atéro hāle matere *monita*, Talené doi sóro horóturaalu, ai so wh̄i tao saaire ketekẹ kolópóló kisipa mutu, d̄ané hotowayóló t̄eteróló kaae tawaai dapó.

²⁰ So whị tao suraalu, hāle melale doasi *moni* dāpaae diaāo hotowaró kaae tani, ọ́lẹmi serapóló mepaae whịné dā eratere fo yāōsóró kisipa mutu dapó.

²¹ Ti noa betené dumipó. Talené kele tómkélé, mo so whịné kele tómkélé, dāné du betere ala mepaae whịrapené kilitu, mo donoi ala dapó yópóló kisi mutu, hotowayóló kaae tarapó.

²² Dāné no me whịkélé atimaamotamo dotonaii dapó. Ā k̄aae kelalemó, mepaae dāné yae dere ala fea ai sekéné mo ketek̄etamo dua yalepó. Diaāo mo wisi ala yaalopóló kisipa mutu, ama take bole ketek̄e tómó miókélé ā Talené ala eraai mo doasi ketek̄e bulapó.

²³ Taitus āta, ẹtamo titiyóló kutó betámó diyóo, dīa kuamó bitu bet̄a kutó diyóo, dere whị beterāpó. Dāné no me whị tamota, ti Kótóné kae beterāo betere so whịné sóro beterāo beterāpó. Mepaae so whịné ai sek̄e tamoné ditera kutó kilitu, dā t̄eteróló kaae tare whị Kerisoné doi doasi hale sóro horatapó.

²⁴ Térapa, Keriso fake so whị feané diaāo yaala sókó fole ala hākeamó kolópóló, ai sore whịrapepaae mo erae. Atétepa, ti diaāo dere alamó dāné dukurótu betere fo mopó enérapó.

9

¹ Kótóné kae beterāo betere so whị tao sae yóló, deté wale fo wosóló, yaaire ketek̄e dīa bunipakó, yālo dīapaae momó yaaloé.

² Ti so whị tao saai diaāo bole ketek̄e yālo mo wisiyóló kisiparapó. Dīa ai ala yaai doasi ketek̄e boleteiné take kemeyale ba fomó kaae sóro, dīa

dukiróturaalu, Masedonia hae kwiamó betó mole so whipaae diã Akaia hae kwiamó betó mole so whimó hãle melaaire *moni* deraai du beteropó fo yãlo deté kwẽalepó. Ai fo woseturaalu, ai be hu-luamó betó mole so whi atimanékélé *moni* deraai hosaa tukalepó.

³ Diaaõ hãle matere alamó ðané diã dukirótu betere fo bete muni nisiyaõsóró, kale bope yale sore norapepi aipaae dotonatapó. Yãlo atimapaee, diã donoróló betepa kelaalopó yale fo diã tuamó motóró epa kolóppóló yae.

⁴ Ti noa yaõsóró dumipó. Mepaae Masedonia whirape ẽtamo wouraalu, diã donoróló bitinipa kilitu, ðané diã dukirale fo kapala irapó deremó, ðákélé diãkélé mo doasi hale yaõsóró ðapó.

⁵ Téyaõsóró, kale norape atimapi folosóró diã beterepaae dotonatepa wisirapóló kisipa mutapó. Ti noatepae, diaaõ hamokoróló hãle melaalopó yale *moni* deróló kemeróppóló kisipa mutu i dere ape. Ai ala depa, ti sêteremó dei kisipatamo meni, wisi kisipatamo hamokoróló hãle melaalopó.

Hãle matere alata, kutómó õla wae dekéro bilitu dere kaae ðapó

⁶ I dere fo wosóló kisipa muae. Mepaae whiné õla wae sawa tóróti bilitepa, ti õla sere alimókélé sawatóró saalopó. Mepaae whiné õla wae dekéro bilitepa, ti õla sere alimókélé mo dekéro saalopó.

⁷ So whi dokõ betã betã sẽtepa dei kisipatamo meni, atima kisipané meteró melaai depa, ti ai sutoró melóppóló yae. Ti noatepae, hosaa tuamó hẽkesetamo matere whi Kótóné mo hẽkeserapó.

⁸ Atétu, Kótóné hamokoróló hãle tao sere ala diãpaae sũratepa, betere dokõ fea diã mepaae noa kaae wisi ala yaai depa, ti me ọla yãyani, mo sũmó enérápó.

⁹ Asemókélé i fo kaae erapó.

“Ama wisi wisi ọla yoleale yóló betó mole so whimó ąliralepó.

Ama so whi tao sóró donoratere alakélé kemeni, hãle yótóro tarapó,” erapó.

¹⁰ Ọla waeró mo nokole *bred* otamo matere Kótóné diaaõ biliyaaire ọla wae fakeróo, ọla ụlumétepa dekéró sóo dere kaae, Kótóné so whi tao sóró donoratere alané du wisikélé diaaõ mo ti fakeróo yaalo ai ape.

¹¹ Téturaalu, diaaõ kae kae ala duraalu, mepaae so whi hamokoróló tao sópóló, Talené diã mo sũraalo ai ape. Diãné atéró hãle matere ọla ðanémo sóró kale yoleale so whimó matepa, Kótópaae atimané mo kée fo yaalopó.

¹² Kótóné so whi tao sóró diaaõ ai eratere alata, atima yãyãtere ọla mótua dapó. Ai maaté mei, Kótópaae doasi kée dere fokélé wẹi kaae fãayóló felée fu beterapó.

¹³ Diaaõ atéró Talené ala eróturaalu, mepaae so whi tao sóró erótu betere ala mepaaené kil-itu, ita Kerisoné fo wisi sya fóló aomó bituraalu, hamokoróló tao sere ala ðãpaaekélé, mepaae so whipaaekélé, eratepa kelae yóló, Kótóné doi hale horaalopó.

¹⁴ Kótóné hamokoróló tao sere ala diã tuãpaae fãanó betereteiné Talepaae momaturaalu, atimané hosaa mo turó diãpaae muóló yaalopó.

15 Kótóné hamokoróló hāle meló betere ala wisinaale mo whīné etérapóló bete turó tokóló enénipó. Atéreteimó, aṗaae mo kée fo du betae!

10

Pol Talené kutó dirateremó kae kae eraterere fo yaletēi

¹ Ẹ diātamo betāmó betale sukamó, ẹ fo kọló kọló yóló wire whī aṗretei, kae tikimó bitu ti wini, halaainé aṣetu beterapóló ẹ eraterere fo ai du betere ape. Tépatēi, Talené fo aṗmó sukóló betere alaró witamo naameiné dua betere alatamo Kerisoné ẹṗaae eratepa, ẹ ai ala tuāmó bitu, ẹ Pol-né diṗṗaae i yae dere fo wosóló, mo yaasepóló dapó.

² Ti ẹ diṗ betereṗaae wale sukamó, mepaae so whīné kisipané ḁa i haemó mole ala sya furaalu, Talené ala eraterere nisiyóló, ḁa eraterere so whī ẹ halaainé foné saṗsóró, diṗ miótitei donoróló betae yóló i dere ape.

³ Ti noateṗae, ḁa i haemó hāle bituraalu dele bóeta, i haemó mo whīné dele bóe kaae meipó.

⁴ ḁané bóe dele ọla ọlakélé, mo bóe dele ọla ọla kaae meipó. ḁané bóe dele ọla ọlata, Kótóné doasi fotokọ faaneteiné Kótótamo bóe duraalu, ere dirii sa fisikóló doranérapó.

⁵ Mepaae so whīné Kótó a etei kaae Tale beterapóló kisipa yaṗsóró sesé duraalu, kae kae fosó fosói foró, bete mole ọla aṗratere alatamoné sa kaae depa, ḁané fisikóló dorótu beterapó. Téturaalu, ḁa tẹteróló kaae tare whī Kerisoné ala eraai mole kisipa kọṗaae faṗsóró, ḁané tuẹ tiki turó Yesuné tẹteróló kaae tare aṗmó mulópóló, mo hotowaró kaae tarapó.

⁶ Diã Talené fo wosóló, aomó sukóló bitu sya fóló erótu betepa, ti mepaae ai fo wosetere hóyóló dowaae fu betere so whi fea dané só deróló kwia melaii dā siki siki yóló betenérápó.

⁷ Diãta, mo tómó ere ala maaté kilitu beterapó. Mepaae whiné ãta, Kerisoné whi beterapó depa, ti dākélé ãre kaae Kerisoné whitóró betereitei ama kisipa yópóló yae.

⁸ Ita, diã só deróló doraai dumitei, Keriso tuamó diriyóló beterate ala dané tetéróló kaae tanópóló, Talené dapaae melalepó. Atérené ę haleni, halainé diãpaae hakeamó i du betere ape.

⁹ Yalo diãpaae ašemó i dere fota, diã wiratere nisi yaose.

¹⁰ Ti noatepae, mepaae whirapené duraalu, “Ama ašemó deterai fo du betepatei, ą wóló betamó bitu dere fota, ti kisipa inire whiné fo kaae hoko du beterapóló,” erótua dapó.

¹¹ Atei kaae eratere fo dere so whiné, dā kae tikimó bitu ašemó dere fo kolósu, dā aipaae wóló mo dere ala kolósu depa, me ala kae mei, mo betā alatóró epa kelaalopó.

¹² Mepaae whirape atimané ditere kutómó atimatei doi sóró horótu dere kaae dané dumipó. Ti atimané du betere ala atimatei taleyóló atimata, etei kaae whirape beterapó du beterapó. Tétu, atimané dere ala kaae kolóló u kolósu, i kolósu du betere alata, wisi tué muluraalu dumipó.

¹³ Atima atépatei, dāta mo dané diale kutómótóró bopé faketu beterapó. Ti dané i ditu betere kutóta, Kótóné dapaae diyae yale dalemótóró dituraalu, dā bopé faketu beterapó. Ai dāle muló betere kutó tuamó diākélé ai bole ape.

¹⁴ Dá fo wisi yó maté kuturaalu, diá beterepaae uámeisóró, ti etei kaae bopé fake dere ala uámeipó. Tépateti, Kerisoné fo wisi diápaækélé yó male waleteiné dá mo donomó bopé fake dapó.

¹⁵ Dáné diyale kutó mupatei, kae whiné diyale kutómó dá bopé fake dumi, mo dáné ditere kutómótóró bopé faketu beteropó. Ti diáne kisipa tiró betere ala faketé fupa, dá diá tuámó bitu ditere kutókélé mo ti fakeraai kisipa mutu, Talepaae tué tiróló hájtamo i betere ape.

¹⁶ Talené mió i wosetere fo wisi dáné erateretei diá tuámó faketepe, ti diá betere tiki mo uteró betó mole so whípaaekélé yó maaté kwéyaai kisipa mutapó. Mené diyale kutómótei, dáné yalepóló hále bopé fake yaqsóró, mepaae whirapené yó menire tikipaae yó maté kwéyaai dapó.

¹⁷ Tépateti,
 “Mepaae whi bopé fakeyaai depa, ti Talené fotokó ą tuápaae sýraleteiné diyalepóló,” enérápó.
¹⁸ Ti me whiné ama diale kutó amatei fopeyóló, ątei dukiratepa, bete munipó. Tépateti, Talené me whiné diyale kutó taleyóló wisirapó depa, ti ai whiné kutó wisi diremó dapó.

11

Aposel aqre whirapené dere alata, Pol-né dere alatamo sunipóló yale fo

¹ Yálo du betere fota bete muni, hoko du betere fotei wosaasepóló i dere ape. Tépateti, ai hoko fo mo taketi yálo deté wou betepa, diaaq woseté walepó.

² Yálo bole ketekęta, diá dokaai tukóló beteró betere whi mo ątamótóró fulumu yópóló, Kótóné

matere ketekéné yało dią mo wisi yóló kaae taru, ma fo i dere ape. Me whiné folokole erénire so seimale kaae betepa, Kerisoné amatóró dokópóló kisipa mutu, yało dią tukóló beteralepó.

³ Tépatei, wuliné fosó fosói kisipané Ipi dilikóló dée nalatu yale kaae, diąné tuę tikikélé mené kópaae ąlisó faqsóró yało doasi whaalia du betepapó. Ti noa betené mei, dią Keriso ątamotóró dokaai, betą kisipa muóló beterópóló dapó.

⁴ Ti yało whaalia dereteita, hałe meipó. Dąné diąpaae Yesu ą etei kaae whípóló yó maletei, mepaae whi dią beterepaae wóló Yesuta, etei kaae whi beterapóló hoko fo yó matepa, diaaą mopóló wosetu beterapó. Atétere kaae, take diaaą sale Dęi Kepe Wisi betepatei, me kepe kae saalopóló de? Take dąné diąpaae yó male fo wisi mupatei taaróló, kisipa tiki okokore whiné dere kaae, mió dią kae yó matere kisi fo wosaai eķęletu beterapó.

⁵ Ti ai whırape atimata, doasi doi mole *apotel* whırapepó du betepatei, atimané ę tęteró bi-tinipó.

⁶ Ti so whi feapaae Talené fo yało fosó fosó yóló yó melópóló mené ę yó menitei, bete mole fo yało mo kisiparapó. Ai ala diąnékélé kisipa yópóló, kae kae ala fea haķeamó erótu betalepó.

⁷ Kótóné fo wisi yó móturaalu yałotei ę deróo, dią tao sóró horóo, du betalepó. Tętu, yało diąpaae *monikó* ąlae yóló kema ini, hałe yó mótu betaletai-a, diąpaae dowi alakó erótu betaleé?

⁸ Aita, dią seķę yaqsóró kisipa mutu, kae be hulua Keriso fake so whiné matere *monitei* yało ąlémi kaae sóró, ę betaaire be ó ąla dupu yóló

nukuraalu, diã tao saaire kutó betã dité fu be-talepó.

⁹ Ẹ diãtamo betale sukamó diã seķe yaḡsóró, ẹ yaḡḡtere ọla diãpaae ọlae yóló wosetere fokélé inipó. Ẹ yaḡḡtere ọlata, Masedonia hae kwia taaróló, ẹtamo wale norapené tao sóró mótua yalepó. Ẹ me ọla yaḡḡtepetei, diã seķe yaḡsóró woseni, Talené kutó hãle dirótóró tawalepó. Nalopaaekélé ai alatóró enérápó.

¹⁰ Ti Kerisoné bete mole mo fo ẹ tuãmó moleteiné diãpaae diriyóló i dere ape. Ẹ me dupu sini, ai fo wisi hãle yó materemó, yãlo i bopé faketerere ala Akaia hae kwiamó betere whĩrapekó betãnekélé bete munire ala aḡraalomeipó.

¹¹ Yãlo diãpaae etei kaae dere fo-a, noa betené dapóló kisipa mute? Yãlo diãpaae yaala sókó fole ala initepa de? Meipó. Diãpaae yaala sókó fole ala ẹ tuãmó moletei, Kótóné ama mo kisiparapó.

¹² Kae fo yó matere whĩrapené du betere alata, so whĩné atima dukirópóló dapó. Aita, ðané dere alaró atimané dere alatamo betã ala erapó yópóló, bopé fake du beterapó. Atei ala yaaire tũ mu-laḡsóró ðã *moni* sini, kutó hãle diró tawaalopó.

¹³ Ti ai whĩrapeta, Kerisoné doteyale mo *aposel* whĩrape mei, so whĩ dilikóló kapala kutó diratere *aposel* whĩrape bitutei, Kerisoné kutó diratere nisi yópóló, aḡtu beterapó.

¹⁴ Ai kaae alamó ðã kilita sókó fenénipó. Ti noatepae, Satan ą ðe tuãmó betere *ensel* aḡtu betereitei, ðané kisiparapó.

¹⁵ Atétere kaae, ama kutó diratere whĩrapekélé mo donoi kutó diratere whĩrape aḡtu betere ala

kilitu, ɗa kilita sókó fumipó. Ti atimané ai du betere alamó saaire dowi dupu haşókó feni, mo donotóró melaalopó.

Pol ɗapaae sekei ala erateremó bopé fakeyale fo

¹⁶ Yało yale fo kaae momó dapa i wosae. Diɗa mepaae whiné ɛ kisipa okokoi whi betere nisi yaɗse. Diaaɗtamo ɛ kisipa okokoi whi betere apó kisipa mutupa, ti ɛ bopé faketuraalu, okokoi whiné dere fo kaae, sawa i dapa wosae.

¹⁷ Fea ala yało şumó enérapóló bopé faketuraaalu dere fota, Talené dere fo kaae meitei, kisipa okokoi whiné dere fo kaae dapó.

¹⁸ I haemó betó mole whirapené nene yóló bopé faketera ala feané sya fóló du betepa, ti ɛkélé nene yóló bopé fakeyaalopó.

¹⁹ Ti fosó fosóre whi diɗta, mepaae kisipa okokoi whiné du betere ala yaɗsóró seséni, hekesereteiné yópóló, kaae tarapó.

²⁰ Ti diɗané mo du betere alatóró i ape. Mepaae whiné diɗ wae sóró kutó diratere whi beteroó, diɗané wisi wisi ɗla atima saai diɗ dilikó, diɗ me ala tuénire whi aɗróló, atimané tué mole ala eróo, atima doasi doi saai dapóló diɗ hepée faróló atimapi folosene fío, atimané diɗ okolope deké sóo, dua dapó. Ai alarape eratepa, atimapaee atékese yóló foné sini, diɗ hałe betó mulapó.

²¹ Ti ɗa béreteiné atei kaae ala diɗpaae eranérapóló, ɛ haletu i dere ape.

Kisipa okokoi whiné dere fo kaae i dapa wosae. Mepaae whi dené ama du betere alamó ɗ bopé fake yaaitepa, ti ɛkélé bopé fakenérapó.

22 Atima Hibru fake so whiné dere ala sya fu betere so whi betere? Atima atépa, ti ẹkélé Hibru whítóró beterapó. Atima Israel hae tale betepa, ti ẹkélé Israel hae taletóró beterapó. Atima Abraham-né deté wale whirape betepa, ti ẹkélé Abraham-né deté wale whítóró beterapó. Atima Kerisoné ala eratere whi betere? Atépa, ti ẹ keyaa furaalu hoko dere fo i ape. Yalo ai kutó ditere alané atima fea mo teraae falapó.

23 Yalo i dere fota, topo doyóló keyaa fole whiné fo kaae hoko dapó. Atima Kerisoné kutó diratere whi betere? Atépa, ti yalo ditere kutó kolósu, atimané ditere kutó kolósu depa, atima yalo mo bosenó beterapó. Ti yalo dité wale kutó atimané diyale kutótamo suni, ẹ mo doasi depe tukó wei kutó ditu betalepó. Ti ẹta, mo dekéro félimó *dipula* beterótua yóo, fokosoi ala yale tikimó yalo tiki mo turukée fóo, ẹ mo felekemó sinitai kepaayóo dua yalepó. Ẹpaae ai erótu betale hapólui ala kaae, atimapaae erénipó.

24 Juda fakené ẹ aporó félimó halika kaae olané yalo tikimó daletei dokó sóró touróturaalu, 39-rópó.

25 Sore fapo atimané ẹ biyané fokosói ala yóo, betá be demó ti kapo duné siriyóo, sore félimó ti ẹ betere wei nuku fetée fóló do yóo yalepó. Tétu ẹ doasi wei kẹla tómó alaee kutu betepa, be de betaró diki betátamo kemeyalepó.

26 Ẹ betá bemótóro bitini, be hulua dokó fiyósu deté kutu betalepó. Atéturaalu, doasi fole wei tikiné ẹ aluranépaitei, teyóló fua yóo, qlémi whirapénékéle ẹ denépaitei, atima betere tuamó fóo, mo yalo be whinékéle ẹ denépaitei fua yóo,

Juda meire fake wh̄inékélé ę denéplatei atima tuamó bitiré fóo, doasi be huluamó bitukélé, ipumó bitukélé, doasi wēi ęęla tómó fukélé, Keriso norape aęre wh̄irapetamo bitukélé, ę mo dóló aluranéplatei, bitiré fóo yalepó.

²⁷ Ę kutó dituraalukélé depe tukó wei ala yóo, kutó ditétóro fu betereteiné nokekélé fini yóo, woteró wēi nokoletamo epatei, haęle fitua yóo, kutikélé ó sikélé meiyóló sosóliné sukóo dua yalepó.

²⁸ Ai alarape tómó, Kótóné kae beteró betere Keriso fake so wh̄i noa tumó wisi yóló betaaloé yóló, doasi whaalia duraalu, ę doasi sekę beleté fu beterapó.

²⁹ Diakó me wh̄i Talené ala eraaire fotokó meiyóló bétépa, ti ękélé bératapó. Diakó me wh̄i dowi alapaae aęisóro fóló dée nukupa, ti ękélé dei kisipa mutu haletapó.

³⁰ Ę bopé fake yaaitamo kisipa mutepa, ti ę tuamó fotokó mei, bére ala so wh̄i feané kolópoló, bopé faketera ala mo haęeamó yó manérapó.

³¹ Yaęlo i dere fota, mo kapala dumipó. Betere dokó so wh̄i feané doi sóro hurótu betere Tale Yesuné Alima Kótóné yaęlo i du betere fo mo dapóló ama tuérapó.

³² Ę Damaskus bemó betepa, botokó faęsóro topo wh̄i Aretasiné be kaae tanópoló, sóro beteró betere wh̄iné ę tawópoló, ama diki tare wh̄irape kale be bolaare dopóku tu dokó sóro beteralepó.

³³ Téyaletai, mepaae norapené ę yomó deyóló halika duóló deralepó. Atéyaletaita, ai be hulua bopére dopóku sikimó, deę saai muló betere dolomó sókó faraletiné atimané ę tani, haęsóko felepó.

12

Pol-né ama nokené kaae kelale ala

¹ Ẹ i bopé faketu betere ala taaréni, haḷe deté fu betenérápó. Ti bopé faketerere ala tuámó me ke bunitei, Talené ẹpaae nokené kaae yó melale alaró kinó betere alatamo haḷearaletei betá diapaae i dapa wosae.

² Ita mió yale ala dumitei, i ala yóló betepa, 14-ró ba fo kemeyalepó. Ai ala kelale whị ẹ ama tiki turó fele ó, kepe maaté feleró ẹ tuęni, Kótóné betá kisiparapó. Ai whị ẹ Keriso tuámó betepa, mené ó hepen bepaae dapesó huturaalu, saḷélé sa taoró ere tikikélé taaróló, mo hepen bepaaetóro dapesó holale whị yaḷo tuérapó.

³⁻⁴ Ti ai sekéta, mo kelaalo kokọi bepaae dapesó horóló beteraletei yaḷo kisiparapó. Ẹ atéro huturaalu, ama mo tiki turó felepé kepe maaté feleró ẹ tuęni, Kótóné betá kisiparapó. Mené fo depa ai sekéné ama wosalemó, bete etérapóló mo hae whịné yókélé enénipó. Ai fo hae so whịpaae uḷtei, yaḷsóró Talené doasi fo mulapó.

⁵ Atei ala ere whịpóló kisipa mutu, ẹ bopé fake uḷtei, yaḷotei ẹ bopé fakenépa taaróló, ẹ hae whị bitu, yaḷo bére alarape betá diané kisipa yaasepóló i dere ape.

⁶ Yaḷo kisipanétamo bopé faketerere ala yaaitepa, ti yaḷo mo yale alatóro dereteiné ẹ topo doyóló okokoi whịné dere fo kaae uḷmeipó. Ti yaḷo yó mótu betale mo foró du betale alatamo diané kḷae kolóló tué yópóló, bopé faketerere ala enépateti, ẹ doasi doi mole whị nisi yaḷsóró taalatapó.

⁷ Talené doasi kinó betere ala eṗaae haḡkeróló yó maleteiné e topo whi bitu bopé fake yaḡsóró, Satan-né doteyale kepené dowi mu képiné kaae, e susupurópóló Kótónétei ai te mulalepó.

⁸ Até yaleteiné yaḡo tikimó doasi dele supa, Talepaae ai ala tokóló taae falae yóló sore félimó yalepó.

⁹ Téyaletéi ama eṗaae duraalu, “Ai sekei ala naao sumó beleyópóló, yaḡo hamokoróló haḡe tao sere ala ya tuṗaae mo sṗraalopó. Ti noatepae, mo whiné enéni bére ala tuṗámó yaḡo fotokḡ so whi feané kolópóló, mo haḡeamó erótua dapó,” yalepó. Atétereteiné Kerisoné fotokḡ e tuṗámó haḡe muó tanópóló, yaḡo enéni bére alapóló tuḡ mutu-raalu, e haḡiyóló bopé faketerere ala taaréni, haḡe yó tawaalopó.

¹⁰ Atéreteiné Kerisoné ala mo ti fakeraairaaalu, bére ala tuṗámó bitukélé, mepaaené e eraterere fo du betepakélé, doasi sekei ala tuṗámó bitukélé, Talené ala erótu betepa sere seke tuṗámókélé, doasi hapólui ala tuṗámó bitukélé haḡitamo betepapó. Téru, mepaae bei ala tuṗámó bitukélé fotokḡ haḡe bulapó.

Pol-né Korin so whi doasi whaaliatu yale fo

¹¹ Ti yaḡotei e kisipa okokoi whiné dere fo kaae yaleteita haḡe mei, diaaḡ du betere alanétei e ai ala dere whi aḡratepa yalepó. Yaḡo du betere alamó diaaḡ e dukiraterere fo uḡsóró ti mo wisi uḡpó. Ti noatepae, e belei sokótei kolósu, ai doasi doi mole *aposel* whirape kolósu depa, atimané e teṡeró bitinipó.

12 Ti ę dią tuąmó bitu, me ala yaairemó dere alarapekélé, sira yópóló eratere alarapekélé, mo whiné enénire doasi kelemei alarapekélé, fea eró taté fu betalepó. Ai alarape kilitu, ita mo *aposel* whiné dapó enérápó.

13 Ti ę mepaae be huluamó Kótóné touróló beteró betere so whı́paae erale ala kolósu, diąpaae erale ala kolósu depa, me noa alakómo diąpaae erénié? Atimapaækélé, diąpaaekélé, betą kaae alatóró erótua yalepó. Ti ę yaąąterere ọla tao sae yaai yaleteti, dią sekę yaąsóró ini, taaralepó. Kae kae Keriso so whı́paaeta dua yaleteti, diąpaae inire ala dorapó kisipa mutepa, ti diąné kwia tani, hałe kemerae.

14 Ę mió sore dakeróló dią kełe waai i du betere ape. Ę aimó wóló bitu, be ó nokole ọla dią sekę melaalomeipó. Ti noatepae, diaaą me ọlakó melópóló waai dumitei, dią mo no apu aleyóló betámó betaai kisipa mutu, walapó. Ti naale senaalené hama alima tao saai dapóló mepaae ọla ọla betąpaae yóló mutumitei, hama alimané naale senaalemó ọla ọla mulatere dua dapó.

15 Atétere kaae, ę mo hekesetamo dią tao saairaalu yało ọla ọlakélé, yało betere betekélé melaalopó. Yało diąpaae mo turó yaala sókó fu betepatei, diąnémo ępaae yaala sókó fole ala sawa tómó maaté dere-a, wisire?

16 Diaaą ę hekese inire aąpatei, yało diąpaae me sekęi ala eréniépó. Tépateti, ba ó nané nale wópóló, ọla wisi mulótu dere kaae, diąné *monikó* ę melópóló kisipa mutu, yało dią dilikąle aąrapó.

17 Dią tao sópóló yało doteyale whı́rapené ó yałokélé dią dilikóló, diaaą noa wisi wisi ọlakó

saleé?

¹⁸ Taitus a ðané no me whītamo ðiā beterepaae wópóló, yało şeyóló doteyalepó. Até yale be ðemó, Taitus-né ðiā ðilikóló mepaae ọlakó saleé? Talené ala eróturaalu, ðamo wusuró betā tuę muóló, betā alatóró erótua inié?

¹⁹ Ti yało ðiāpaae ašetu betere fo diaaọ dosąaté waletai-a, mené ða só deraqsóró seséturaalu ðapóló kisipa mute? Meipó. ðané i du betere fota Keriso tuąmó bitu, Kótóné keletómó mo i dere ape. ðané hosaa mole no nerape-ó, ðané i du betere ala feata, ðiā fotokọ buóló beterópóló ðapó.

²⁰ Ti noatepae, ę aipaae wale sukamó, ðiā mo wisiyóló betepa kelenée dere ala ðiā tuąmó ini yóo, ðiānékélé ę tuąmó epa kelenée dere ala ę tuąmó inipa kelaalomólópóló, ę doasi witu betera-pó. Ę ðiā beterepaae wóló kelenalemó, ðiā tuąmó họle fokélé, me whinė dere alamó dei tuę mutere alakélé, fopaae buóló họle sere alakélé, fake teketerere alakélé, dowi fopaae butu me whi yóló sininatere alakélé, kikiti eratere fokélé, dowąae fóló bopé faketerere alakélé, wisiyóló bitini, họko betere alakélé, ai alarape fea ðiā tuąmó epa ke-laqsóró, ę doasi whaaliatu betera-pó.

²¹ Ę ðiā beterepaae wale sukamó diaaọ ai dere ala kilitu, ę teteróló kaae tare Kótóné keletómó, ę momó halenérápóló wi ðapó. Mo take dowi ala du betale so whinė mepaae hosekéyóló du betale dowi alakélé, nópu nokole alakélé, enénire son-aalei dowi alakélé taaréni, hałe yótóró tapa kilitu, ę deke yaqsóró whaalia duraalu ðapó.

13

Diã Yesu Kerisopaae kisipa mo tiró betereómóló diaaõtei kãae kelae

¹ Mió yãlo diã sore dakeróló kële waai i dere ape. “Mepaae so whĩné hãsókó fóló dere alarape tale-turaalu, betã whĩné dere fo maaté woseni, tamo ó sore whĩné i ala mo depa kelalepó dere fo wosóló, ti taleyóló donoranérápó,” erapó.

²⁻³ Ẹ tamo dakeróló diã kële wale sukamó, dowi ala dere so whĩpaae etei kaae sekei ala eraalopóló diãpaae yalepó. Mió ẹ kae tikimó bitukélé betã kaae fotóró momó i dapa wosae. Kerisoné du betere fo yãlo mo dapóló diaaõ kisipa yaasepóló, ẹ wouraalu take dowi ala deté wale so whĩró mepaae dowi ala du betere so whĩtamo kwia matere ala kọleturaalu taaréni, mo melaalopó. Ti Keriso ąta, diã tuãmó mole dowi alarape dono-raaitere ala ą bėni, fotokọ mo turó bulapó.

⁴ Ti i dere fota, mo dapó. Keriso ą fotokọ buni bėre whĩ aoyóló, atimané ą filipaare ni tómó daletei, Kótóné fotokọné ą mo beterepó. Atėre kaae, dã fotokọ buni bėre whĩrapetei Kótó ątamo betãmó betereteiné ama fotokọ dã tuãpaae sũratepa, diã tao saai Talené kutó hãle diraté fu beterepó.

⁵ Diã Yesu Kerisopaae tuę tiki tiró betere ala diaaõtei kãae kólóló taleyae. Atėnalemó, Yesu Kerisopaae kisipa tiratere ala inipa, ti yã ą tuãmó bitinipóló kisipa muae.

⁶ Ti diaaõ dã kãae kolóló talenalemó, Yesu Kerisopaae tuę tiki tiró betere ala epa, ti diaaõ mo hãkeamó kelenérápóló kisipa mutapó.

⁷ Diã me dowi ala yaqsóró, Kótópaae suka fea ðané momarótu beterapó. I dere fota, Talené ða kaae kolóló, whi wisipó deremó so whiné ða dukirópóló dumitei, ðané hoko dere alamó só deró betere whirape aqpa, ðiãta mo donoi ala wisi du betere whi betaasepóló ðapó.

⁸ Kale bete mole mo fotamo ðané bóe dóló me ala enéni, ai fo wisi fakeratere ala betã enérapó.

⁹ Ða fotokõ buni bépatei, ðiã mo doasi fotokõ buóló betepa, ti ða mo haipapó. Ðané ðiamó momarótu betere alata, ðiã haepaae derepeletei, momó Talené ala eraté furaalu, ðiã mo ti diriyóló beterópóló ðapó.

¹⁰ Atére betené, ẽ ðiã beterepaae waai teópatei, yało i asetere fo kolóló ðiasisi bitu, mepaae ðiã tuãmó ere alarape donoraasepóló i dere ape. Ti noa yaqsóró mei, Talené ẽpaae ama so whi tetéroló kaae tawae ere fo sya furaalu, ẽ aipaae wale sukamó ðiã deteraayóló foné saqsóró ðapó. Ti Talené ẽ ðiã tetéroló kaae tawópóló sóró beteraleteita, ðiã doróló só derópóló ini, tao sóró wisiraté fópóló yalepó.

Kemeróturaalu kõleó yale fo

¹¹ No nerape-ó, mo kemeróturaalu ðiapaae kõleó i dere ape. Me haşókó fole ala ðiã tuãmó muni, Talené ama ala mo donoyóló erae ere ðalemótóró sókó faasepóló, hotowaró erótu betae. Aşemó yało ðiapaae i yae dere fotóró mo wosóló, ðiã fea mo betã kisipatóró mulu, hosaa muni deyóló mo dua betó muae. Atétepa, ti yaala sókó fole alaró hosaa muni deyóló dua betere alatamo, matere Kótó a ðiãtamo betaalopó.

¹² Dià Kótóné mo kae betero betere so whi bitu, diasisi yaala sókó fóló, aputu betae.

¹³ Imó ętamo Talené kae betero betere so whi feané diapaae koleó dapó.

¹⁴ Dá tetetoló kaae tare whi Yesu Kerisoné hamokoroló hale tao sere alakélé, Kótóné yaala sókó fole alakélé, Dei Kepe Wisiné eratere u yó mótu i yó mótu dere alakélé, dià feapaae eró tanópóló yae.

**Yesu Kerisoné So Whi Tao Sere Kisi Fo Wisi
The New Testament in the Falopa Language of Papua
New Guinea**

copyright © 2005 Wycliffe Bible Translators, Inc.

Language: (Folopa)

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

 You include the above copyright and source information.

 You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2009-10-31

PDF generated using Haiola and XeLaTeX on 18 Apr 2025 from source files dated 31 Aug 2023

0102a9df-173c-5a64-b766-14ab67a86105